

ми боярынъ господарьскій повету Городенского Миско Мартиновичъ на боярына господарьского повету Городенского Гришка Шакдаевича тымъ обычаемъ, штожъ дей заставилъ есми ему былъ жупицу свою у дву грошахъ и кгда дей я до него пошолъ, хочечи ему пенези его за жупицу отдати, а жупицу свою до себе взяти, онъ мене безвинне збилъ и зранилъ, который дей бой ираны свои тогожъ часу на враде оказывалъ. И тотъ Гришко Шакдаевичъ, постановившись передъ нами обличне у права, отказъ чинилъ, ижъ дей я его николи не билъ, ани о томъ ничего не ведаю, а ведь же дей есми ему будетъ до мене якая потреба, нехай онъ мене правомъ уживаетъ у отца моего. И тотъ Миско Мартиновичъ на то поведилъ, ижъ дей онъ вжо есть давно на отчизне своей оселый и отецъ его вже давно ему жону поняти допустилъ, с которою онъ на отчизне своей мешкаетъ, с тыхъ причинъ повиненъ онъ мне тутъ отказывати; а што ся дей дотычетъ того бою моего, тогдымъ я подлугъ оказанья на враде ранъ своихъ готовъ доводить. То пакъ тотъ Гришко Шакдаевичъ, не хочаи ся тому Миску до конца усправедливити и с права прочъ зышолъ. А такъ мы судьи, выслухавши жалобы его, тому порозумевши и обачивши, кгдажъ тотъ Миско Мартиновичъ тотъ бой свой на враде оказывалъ и теперъ у права подлугъ оповеданья ранъ своихъ такъ бой свой доводить былъ готовъ, тотъ Гришко Шакдаевичъ, почавши у права отказывати и до конца не хочечи ся усправедливити и с права прочъ зышолъ, знашли есмо то, абы тотъ Гришко того Миска Мартиновича навезалъ подлугъ стану его шлехетского дванадцатьма рублями грошей, и рокъ заплате зложили 4 (4) недели. И тотъ поступокъ права ихъ, справъ суда нашего дали есмо то до книгъ земскихъ судовыхъ записати.

№ 300. *Рѣшеніе по спору между Кузьмою Павловичемъ и его зятемъ Левоневичемъ о приданномъ.*

Сужоно Кузьму Павловича зъ Яковомъ Левоневичъ.

Року Божьего нароженя 1556 (1556), месеца Ноябра 30 (30) дня, в понеделокъ.

Мы слуги короля его милости Петръ Мицута — хоружий, а Миколай Шимьковичъ Толочко — судьи повету Городенского смотрели есмо того дела. Стояли передъ нами очивисто. Жаловалъ намъ за позвы нашими подданный господарьскій Яковъ Левоневичъ на боярына господарьского повету Городенского Кузьму Павловича тымъ обычаемъ, штожъ дей онъ далъ за мене дочку свою в малженство на имя Марыну, по которой дей дочке своей мель мне дати половину земли своей всее такъ и сеножателей, будованья и всихъ статковъ домовыхъ, то пакъ дей онъ нетъ ведома для которыхъ причинъ мне отдати и поступити не хочеть. И тотъ Кузьма Павловичъ, ставши передъ нами очивисто у права, на жалобу его отказъ чинилъ: правда есть, ижъ я за него дочку свою в малженство далъ, нижли половину земли, будованья ему есми дати не обещалъ, бо еще маю в себе иншие дети, дочки, а такъ тымъ детемъ моимъ всимъ по животе моему тая земля и статки мои на ровный дель ся зостанеть; а если дей онъ на то якую истоту, або листы маеть, нехай тутъ передъ вами у права покажетъ, я водлугъ запису своего готовъ буду утерпеть. И тотъ Яковъ Левоневичъ жадныхъ листовъ и истоты на то в себе быти не поведилъ. А такъ мы судьи, выслухавши жалобы и отпору ихъ, тому порозумевши и обачивши то, кгдажъ тотъ Яковъ жадного доводу ани листовъ записныхъ одъ того Кузьмы Павловича на половину земли его и статковъ не показалъ, одно голыми словы того на него доводилъ, с тыхъ причинъ знашли есмо того Кузьму Павловича на противку тому Якову Лео-

невичу быти вольнымъ, маеть Кузьма Павловичъ самъ тую землю и статки до живота держати. А ку тому тотъ же подданный вышей описаный Яковъ жаловалъ за тымижъ позвы нашими на тогожъ боярына господарьского Кузьму Павловича: кгда дей есми оную дочку его в малженство за себе взялъ, на онъ дей часъ взяли они у мене в домъ свой готовыхъ пенезей семьдесятъ копъ грошей литовское личбы, а пятьдесятъ копъ жита, а петеронадцать животины рогатое, а чотыре кони, каждый конь по три копы грошей, а двадцатеро овецъ, свиней пятеронадцать, гречины трыдцать бочекъ, овса к̃ (20) бочокъ, гусей петеронадцать, простицъ петнадцать, каждая по її (15) грошей, нароговъ її (15) сохъ, и того ми дей они ничего теперъ вернути и оддати не хочуть. И тотъ Кузьма Павловичъ на то отказъ чинилъ, ижъ дей я яко на тотъ часъ, коли дочку свою за него в малженство давалъ, такъ и потомъ тыхъ речей, о которые онъ на мене жалуетъ, николи есми отъ него не бралъ и готовъ есми на томъ восполокъ и з жоною своею присегу свою телесную вделати, штожъ я тыми речьми ему не виненъ. И тотъ Яковъ, не маючи в себе никоторого запису, ани доводу на тые речи вышей описаные, на присегу ему з жоною пустилъ. А такъ мы судьи, бачечи то, кгдажъ тотъ Яковъ жадныхъ записовъ, ани доводу на тую сумму пенезей и речей вышей описаныхъ на то в себе быти не поведилъ, водлугъ добровольного позволения его самого присегнути тому Кузьме Павловичу и з жоною его допустилъ, и рокъ присязе зложили есмо на завтрей у во второкъ. Кгда тотъ рокъ на завтрей припалъ, постановившися передъ нами, Кузьма Павловичъ присегу телесную восполокъ и з жоною своею вделалъ на томъ, што тое суммы пенезей семидесятъ копъ грошей, такъ збожъя, быдла, яко при выданью дочки своей, такъ и потомъ николи не бралъ, которое присеги и самъ тотъ Яковъ догледалъ. Мы судьи подлугъ присеги ихъ отъ всихъ ре-

чей вышей описаныхъ того Кузьму Павловича вчинили быти вольнымъ. И тотъ поступокъ права ихъ, справъ суда нашего дали есмо то до книгъ земъскихъ судовыхъ записати.

№ 301. *Рѣшеніе по спору между Малейцовичемъ и Швалевичемъ о землѣ.*

Сужоно боярына Костюка Малейцовича и з Занцомъ Швалевичомъ.

Року Божьего нароженья ҃ѣфн̄с (1556), месеца Декабра ҃а (1) дня, у во второкъ.

Петръ Мицута—хоружий, а Миколай Шимковичъ Толочко—судьи повету Городенского, смотрели есмо того дела. Стояли передъ нами очивисто. Жаловалъ намъ за позвы нашими боярынъ господарьский Занецъ Швалевичъ на боярына господарьского Костюка Малейцовича тымъ обычаемъ, штожъ дей первой того померчие господарские дали мне землю на Тоболе у отмене за землю мою власную отчизную Шиповщизну, на што и квиты свое тые померчие королевое ее милости на тую землю мне дали, то пакъ дей я черезъ не малый часъ у держаньи тое земли былъ, а потомъ заставилъ ее одному боярыну господарьскому Игнату у двадцати копахъ грошей, то пакъ дей онъ, не маючи до тое земли ничего, в того боярына Игната половину тое земли отнялъ, а тотъ дей Игнатъ половину пенезей своихъ на мене презыскуеть. И тотъ Костюкъ Малейцовичъ, ставши передъ нами очивисто у права, на жалобу его отказъ чинилъ тымъ обычаемъ: што се дей дотычетъ тое земли на Тоболе, тогды дей половицу тое земли мне с права держати подалъ намесникъ королевое ее милости Городенский панъ Левъ Михайловичъ, которую дей я половицу земли и теперъ держу водлугъ суда пана Львова намесника Городенского. И тотъ Занецъ на то поведилъ—ижъ дей

я з нимъ о тую землю передъ паномъ Львомъ не стоялъ и о то мене панъ Левъ з нимъ не судилъ, а если дей онъ и з суду пана Львова выпишъ, або листъ увяжчий маеть, нехай дей онъ тутъ передъ вами судьями покажетъ, але дей то есть земля моя власная отчизна, которые померчие господарские мне яко панъ Андрей Непрецкий, такъ и панъ Якубъ Осмольский, а панъ Андрей Тарновский мне ее заведши, и квиты свои мне на то подавали, которые передъ нами оказалъ, у которыхъ то светчить, ижъ померчие господарские яко панъ Якубъ Осмольский, такъ Андрей Непрецкий и панъ Тарновский тую землю на Тоболе одному Занцу у отмене дали. А такъ мы судьи, выслухавши жалобы и отпору ихъ, тому порозумевши и обачивши то, кгдажъ тотъ Костюкъ Малейцовичъ жадного листу судового, ани увяжчого передъ нами не показалъ и в себе его быти не поведилъ и никоторого доводу и истоты передъ нами не показалъ, зачимъ бы тую землю держати мелъ, а тотъ Занецъ квитами померчихъ кроровое ее милости того довелъ, што ему тую землю, яко отчизну его, у отмене держати подано, а никому иншому, с тыхъ причинъ тую землю зо всемъ подлугъ квитовъ померчихъ кроровое ее милости на Тоболе держати есмо тому Занцу присудили, и ему есмо в моцъ ее подали. И тотъ поступокъ права ихъ, справъ суда нашего дали есмо то до книгъ земскихъ судовыхъ записати.

№ 302. *Яка записи объ отдачѣ Андреемъ Лукашевичемъ своего имѣнія въ залогъ Андрею Непрецкому.*

Сознанье Анѣдрия Лукашевича на заставу имения Русоцкого Непрецкому.

Року Божьего нароженя 1556, месеца Декабра 6 (9) день, в понеде-
локъ.

Пришедчи передъ насъ обличне Петра Мицуту—хоружого, а Миколая Шимковича Толочка—судей повету Городенского и до книгъ земскихъ дворянинъ господарский панъ Андрей Лукашевичъ Воловича созналъ и оповедалъ то, ижъ ку своей пильной потребе позычилъ пенезей готовыхъ чотыриста копъ грошей личбы и манеты литовское, кождый грошъ по десети пенезей белыхъ, у пана Андрея Непрецкого—тивуна и городничого Троцкого, которые пенези позычилъ платечи долгъ пану Якубу—подстаростему Лидскому; у которыхъ дей пенезехъ увезалъ ся былъ панъ Якубъ у пять службъ людей двора моего Сидренского, а ку тому такъ же платечи долгъ жиду Городенскому Мошку Докторовичу, который жидъ такъ же одержалъ былъ увяжчий отъ короля его милости в ыменье мое Сидренское, а в тыхъ пенезехъ чотырохъсотъ копъ грошей поступилъ и далъ есми увязанье пану (Андрею) Непрецкому ыменье мое Сидренское з дворомъ, со всимъ су . . . ми тяглыми, з бояры и з невольною челядью, с пашнею, и з сеножатями, з млыномъ, ставы, с корчмою, з лесомъ, и ку тому двору Сидренскому прислухающимъ, по тые месца, покуль есми мы межи собою розмеривши и тесы записали такъ далеко и такъ широко, яко се тое ыменье Сидренское в собе здавна маеть, зо всими пожитки и доходы того ыменья, ничего на себе ани на потомки свои не оставуючи окромъ дворца Микелевского, пашни людей и бояръ и лесу отмероного половины, ку тому дворцу Микелевскому прислухаючого, который дворъ панъ Андрей Непрецкий маеть держати до суполное заплаты тое сумы пенезей чотырохъсотъ копъ грошей; а панъ Андрей ся вырекъ, не хочечи самъ черезъ себе, ани черезъ службениковъ своихъ в тое ыменье вступати подъ совитостью тыхъ чотырохъсотъ копъ грошей; а хто бы ся з близкихъ, або зъ обчихъ мелъ в тое ыменье вступати, созналъ, хочечи его очищати своимъ властнымъ накладомъ, або если бы не очистилъ, подвезалъ ся совитость платити, не беручи жад-

ное речи на помочь, ани листовъ его королевское милости; а кгда бы тую суму пенезей (не заплатилъ), тогда маеть панъ Непрецкий водлугъ рейстру, который особливѣ пану Непрецкому далъ, ему тое именье поступити, ани на жадный инъший рокъ того именья у пана Непрецкого выкупити не маеть, только на день Божьего нароженья; а кгда на тотъ рокъ тое именье панъ Андрей окупати у пана Непрецкого похочетъ, маеть ему панъ Андрей дать знать передъ тымъ рокомъ за чотыри недели; а ведь же дей панъ Непрецкий не маеть в томъ часе тыхъ подданныхъ моихъ ничимъ обтежити надъ повинность и звыклость ихъ и не маеть тежъ панъ Непрецкий лесовъ обчимъ людемъ давати пустошити, а звлаща зо пня рубати, окромъ што на волоки вырубано, лечъ ку своей потребе будетъ воленъ брати, окромъ соснового гаю, который маеть быти во впокои заховаѣ, лечъ на потребу двора Сидренского ку будованью маеть взяти такъ и лесу Сидренского, ку потребе дворной вживати маеть, кромъ дубу сырого и бортьного, а будованья дей старого в томъ дворе панъ Непрецкий поправовати маеть. А што ся дей дотычетъ послуги господарское военное, то я дей за тое именье на себе беру, нижли дей бояре того двора моего Сидренского мають на послугу господарскую военную зо мною ехати, а люди тамошние Сидренские повоеничизну, которую вранникъ пана Непрецкого избрати маеть, до рукъ моихъ дати, а я дей самъ такъ и служебники мои тое повоеничины избирати не маемъ. На што дей есми и листъ свой записный особливый пану Непрецкому подъ печатми некоторыхъ людей добрыхъ на себе есми ему далъ, в которомъ ширей а достаточней тая застава именья моего Сидренского есть описана. И просилъ насъ панъ Андрей Воловичъ за то, абы тое добровольное сознание его и застава именья Сидренского в тыхъ чотырохъсотъ копъ грошей пану Непрецкому до книгъ земскихъ судовыхъ записано было. Мы судьи, выслухавши доб-

ровольного сознания его, дали есмо то до книгъ земскихъ судовыхъ записати.

№ 303. Мовенье пана Быстрицкого зъ вижомъ поветовымъ Станиславомъ Быльчичомъ.

Року Божьего нароженья 4556 (1556), месеца Декабра 5 (5) дня, у четвергъ.

Постановившия передо мною Петромъ Мицutoю—хоружимъ, судьей повету Городенского юргелтъникъ его королевское милости панъ Матей Яцковичъ Быстрицкий и вижъ поветовый Городенский Станиславъ Быльчичъ, и панъ Матей Быстрицкий оповедалъ, ижъ што первой того, маючи мне справу тутъ у васъ судей за позвомъ моимъ противъ (ихъ милостямъ) паномъ Сапегамъ, и будучи мне у в ызбе вашей судейской у Городне, а такъ тотъ вижъ поветовый Станиславъ Быльчичъ оповедалъ мне неякий листъ, писанный отъ вельможного пана его милости пана Миколая Юрьевича Радивиля—воеводы Троцкого на жалобу пановъ Сопегъ, которого дей листу мне не давши, ани копей, и засъ до себе взялъ; то пакъ дей панъ Дмитръ Сапега тыми часы будучи в его милости пана воеводы у Зблянехъ и показывалъ передъ паномъ его милостью квитъ того Станислава Быльчича вызнанья его, якобы онъ мне тотъ листъ пана его милости подати мелъ и при поданью того листу, рокъ мне подъ страченьемъ права якобы зложити мелъ; ино дей на онъ часъ, кгда тотъ Станиславъ Быльчичъ тотъ листъ только мне оказавши и копей з него не давши засъ до себе взялъ, а року никоторого мне . . .

№ 304. Жалоба боярина Курницкаго на боярина Ермолу за нанесеніе ему побоевъ.

Оповеданье боярина Миколая Курницкаго на боярина Ермолу и сына его Олехна о бой.

Року Божьего нароженья ѿфѣз (1557) месеца Генвара ѿ (1) дня, у пятницу.

Пришедчи до насъ Петра Мицуту—хоружого, а Миколая Шимковича Толочка—судей повету Городенского и до книгъ земскихъ бояринъ господарский повету Городенского Миколай Курницкий восполекъ зъ мещанкою места Городенского Томилоу Войтеховоу жаловалъ и оповедалъ то, ижъ дей дня минулаго месеца Декабра ѿѣ (29) дня у волторокъ, едучи дей мне зъ мещаниномъ места Городенского Войтехомъ Романовичомъ отъ князя Ивана Федоровича Масальскаго, ино дей вже у вечеръ позно заехали дей есмо до дому боярина повету Городенского Ермолы и послали есмо до того Ермолы служебника его Грышка, просячы, жебы намъ дозволилъ переночевать въ дому своемъ, и онъ дей черезъ служебника своего Грышка отказалъ, поведаячы, ижъ теперъ есми самъ и з гостями моими подпиль, не могу до васъ ити, и казалъ дей намъ пива дать и в дому своемъ переночевать намъ дозволилъ, а потомъ дей пани старая до насъ до избы пришла и мы есмо и пани старой просили, жебы она до того Ермолы дошла и его просила, жебы намъ дозволилъ ночовать, она тамъ в него бывши, намъ отказала: панъ дей мой казалъ дей в дому своемъ ночовать; а потомъ дей мало пождавши, пришедчи до насъ слуга того Ермолы и намъ мовилъ: хъто, поведая, вамъ тутъ дозволилъ у дворе пана моего стоять? И мы мовили тому служебнику его: намъ дозволилъ панъ твой Ермола в дому своемъ ночовать, и шли есмо и з избы прочъ, хотечи з дому его ехати прочъ, то пакъ дей сынъ того Ермолы Олехно зобравъшися с помочники своими насъ самыхъ бити почали, ажъ дей ледве есми ямъ одинъ з мужикомъ своимъ з дому его втекъ, а товариша дей моего

мещанина места Городенского Войтеха Романовича тамъ в дому своемъ тотъ сынъ его Олехно зачинилъ зо вѣсьми статки и коньми его: нетъ ведома его забили, або где подели. При которомъ бои згинуло мне пять копъ грошей с калитою, а сикгнетъ мой сребраный, а листъ мне потребный, якожъ и раны служебнику моему Федьку оказывалъ, который огледавши, до книгъ созналъ и поведилъ, ижъ видель есми в того Курницкаго на левой руке на плечи черлено, а на оку правомъ такежъ черлено. И тую жалобу и оповеданье свое, такъ и вижово сознанье далъ собе тотъ Курницкий до книгъ земскихъ судовыхъ записати.

№ 305. Дарственная запись Богуша Кошчи своей женѣ на имѣніе Свислочь.

Сознанье Богуша Кошчи жонѣ его Марыне Михайловне.

Месеца Генвара ѿ (4) дня, у понедѣлокъ.

Пришедчы обличне передъ насъ Петра Мицуту—хоружого, а Миколая Шимковича Толочка—судей повету Городенского дворянинъ господарский Богушъ Григорьевичъ Кошчичъ оповедалъ и созналъ то, ижъ дей, дознавши есми ку собе доброе а цнотливое захованье малжонки моей Марыны Михайловны и повольности, которыи она мне малжонку своему оказывала, такъ и цноты ее, которыи она идучи за мене у малженство паненствомъ своимъ оказала, и хотечи, абыхъ ее за то которое досыть вчиненье вделалъ и тыи повольности ее нагородилъ, з ласки своей даю и дарую ее малжонце моей и записую третью часть имения моего Свислочьского зо всемъ на все, яко ся в собе тая третяя часть имения моего, то есть з будованьемъ дворнымъ, з гумномъ, з быдломъ рогатымъ и не рогатымъ, статкомъ домовымъ, што кольвекъ в томъ дворе моемъ Свислочи есть, и тежъ